

L'integrasiun cumainza

Davo cha tuot ils quatter cumüns chi fan part al Consorzi Chasa Puntota/Dmura d'attempats in Engiadina Bassa han dit schi a l'intent cumainzan uossa las lavuors per integrar la dmura i'l Center da sandà Engiadina Bassa.

Las radunanzas cumünalas da Valsot e Zernez han dit tuottas duos unanimamaing schi al proget nomnà Chüra futura. A l'urna han il cumün da Scuol (s-chars 87 pertschient da las vuschs) e'l cumün da Samignun (75 pertschient) acceptà quist proget chi prevezza dad integrar la Chasa Puntota i'l Center da sandà Engiadina Bassa (CSEB). Uossa cha tuots quatter cumüns han approvà il contrat davart il transferimaint da la facultà tanter il Consorzi Chasa Puntota/Dmura d'attempats in Engiadina Bassa (CCPO) e'l CSEB pon cumanzar las lavuors in chossa. La direcziun strategica da quist proget han Ursina Mengiardi chi presiedescha il Consorzi Chasa Puntota e Philipp Gunzinger. El es delegà da la suprastanza dal cussagl da fundaziun dal Center da sandà Engiadina Bassa.

Sco cha Mengiardi e Gunzinger comuniccheschan, d'eiran nats ils plans da collavurar plü ferm in avuost 2016.



L'Ospidal a Scuol es ün dals partenaris dal Center da sandà Engiadina Bassa. Uossa vain pro eir la Chasa Puntota. fotografia: Benedict Stecher

Quella jada as vaiva cumanzà a planisar in Chasa Puntota üna partiziun per persunas chi douvran causa demenza plü gronda chüra. Quella jada vaivan las duos organisaziuns decis da coordinar lur sportas e servezzans in connex culla chüra da persunas attempadas e decis dad ir üna via cumünaivla. «Las preparaziuns per l'integrasiun da la gestiun da la Chasa Puntota i'l Center da sandà Engiadina Bassa per Büman 2020 sun conclüsa», scrivan els, «uschea pon gnir trats a nüz ils potenzials da sinergias in regards multifaris.» Da quellas sinergias dessan pu-

dair profitar ils cliaints chi douvran chüra ed eir las collavuraturas e collavuratuors. «La collavuraziun pussibiltarà eir da megliorar la qualità da las singulas sportas dal CSEB bainbod cumpletta e dad augmantar l'efficacità e l'effizienz dals servezzans interns», sun persvas Ursina Mengiardi e Philipp Gunzinger. Quist svilup correspuonda, sco chi agiundschan, eir a la strategia da la politica da sandà chantunala, sco ch'ella es fixada i'l «Profil directiv per l'organisaziun dal provedimaint da sandà i'l chantun Grischun».

(anr/fa)